



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Achates Tiberianus, Sive Gemma Cæsarea, Antiquitate,
Argumento, Arte, Historiâ, prorsùs incomparabilis, Et cui
parem in Orbe Terrarum, non est reperire, D. Augusti
Apotheosin, Imp. Cæs. Tiberii, ...**

Le Roy, Jacques

Amstelædami, 1683

Segmentum III.

urn:nbn:de:hbz:466:1-38368

Tamen longè majora & firmiora de eo judicia in morte ac post mortem exitere. Quo defunctus est die, lapidata sunt Tempia, subversæ Deum aræ, Lares à quibusdam familiares in publicum abjecti, partus conjugum expositi. Quin & barbaros ferunt, quibus intestinum, quibusque adversus nos bellum esset, velut in domestico communique morore consensisse ad inducias. Regulos quosdam barbam posuisse, & uxorū capita rasisse, ad indicium maximi luctus. Regum etiam Regem & exercitatione venandi & convictu Megistanum abstinuisse, quod apud Parthos iustitii instar est.

Adscribenda quoque Taciti verba Annal. lib. 2. qui ait eum obiisse: Ingenti luctu Provincie & circumjacentium populorum. Indulere exteræ nationes Regesq. Tanta illi comitas in socios, mansuetudo in hostes: visu, & auditu juxta venerabilis, cum magnitudinem & gravitatem summæ fortunæ retineret, invidiam & adrogantiam effugerat. Funus sine imaginibus & pompa; per laudes, & memoriam virtutum ejus, celebre fuit. Et erant qui formam, ætatem, genus mortis, ob propinquitatem etiam locorum, in quibus interit, Magni Alexandri fatis adequarent. Nam utrumque corpore decore, genere insigni, haut multum triginta annos egressum, suorum insidiis externas inter gentes occidisse. Sed hunc mitem erga amicos, modicum voluptatum, uno matrimonio, certis liberis egisse: neque minus præliatorem, etiamsi temeritas abfuerit, præpeditusque sit percussas tot victoriis Germanias servitio premere. Quod si solus arbiter rerum, si jure & nomine regio fuisset, tantò promptius adsecuturum gloriam militiæ, quantum clementiâ, temperantiâ, cæteris bonis artibus præstitisset. Corpus antequam cremaretur, nudatum in foro Antiochiensium, qui locus sepulturæ destinabatur. Prætulertine veneficii signa, parum constitit. Nam ut quis misericordiâ in Germanicum, & præsumptâ suspitione, aut favore in Pisonem pronior, diversi interpretabantur.

SEGMENTUM III.

INferiori Segmento *Peireskius* novem decemve Nationum Captivarum figuras contineri, dixit, sed quarum planius ille existimarit, non addit.

Pleniùs sese explicans *Albertus Rubenius*, hîc illustres captivos Germanos à CÆSARE GERMANICO domitos, & in triumpho traductos, exhiberi arbitratur, qui à Strabone recensentur.

Nempe *Segimundus*, *Segeſtis filius*, *Cheruſcorum Dux* *Sororq^{ue} ejus*, *Vxor Arminii*, *Thuſveldæ*: nec non *Filius ejus Thumelicus*, *tres natus annos*.

Præterea *Sefthiacus*, *Segimeri*, *Cheruſcorum Ducis Filius*: *ejusque Vxor*, *Ramis*, *Veremeri Cattorum Ducis Filia*, & *Deudorix Sicamber*, *Boetoritæ Filius*, qui *Frater erat Melonis*.

Porro, Captivos iſtos qui in hac GEMMA ſpectantur Germanos non eſſe, non tantum capitum tegumenta, & veſtimenta cætera, ſed & armorum genera clarè evincunt.

CIDARIM induta ſedet pars maxima. Erat *Cidaris* circulus rotundus caput ambiens, in fluxam veſtem per cervicem descendens: qualem deſcribit *Julius Pollux* *Onomaſtici lib.* qui habitus *Populi Aſiatici*, non *Germanorum* erat.

Præterea, cum arcus, pharetræ, ſagittæ, & *Gorgon Palladis* in *Clypeo* ibi ſpectentur; alterius *Gentis* arma illa eſſe certum eſt.

Neque enim *Germani* arcu aut ſagittis utebantur, ſed *contis*.

Quid hæremus? *Armenii à Tiberio Auguſto* domiti hic deſignantur.

Rationi enim conſonat, ut illius *Trophæa* hic recenſeantur, qui caput & ſubjectum primarium eſt hujus *Imaginis*; nempe *TIBERIVS*, cujus gloriæ *Segmentum inferius* totum eſt deſtinatum. Eo enim continentur *Armeniorum & Parthorum*, erga *Romanum Imperium* reverentia, cultus & obſequium.

Suetonius bella per eum geſta recenſens, expeditionis *Armeniæ*, meminit his verbis: *Ducto ad Orientem Exercitu*, *Regnum Armenia Tigrani* reſtituit,

tuit, ac pro Tribunali diadema imposuit. Recepit & signa, quæ Marco Crasso ademerant Parthi.

Perpendant quæso omnes qui Romanam Historiam ritè perscrutarunt, an quid præclariùs Tiberius in vita egerit, an quid gloriosius de illo dici possit?

A N N O T A T A.

Arcus, Phætræ, Sagittæ. ARMENII omnium gentium maxime sagittiferi erant. Undè Papinius lib. i. Sylvar.

Pannoniusq; ferox, arcuq; horrenda fugaci
ARMENIA, & patiens Latii jam pontis Araxes.

Ovidius ad Liviam.

ARMENIVSQVE fugax.

Claudianus Panegy. de Consulatu Honorii.

Scis quo more Cydon, quâ dirizat arte sagittas,
ARMENIVS, volucris quæ sit fiducia Partho.

Cæterum à læva parte carceris, captivus prope thoracem sedet, capillis calamistro vibratis, & in orbem tortis, sedent & alii, capillis tortis & erectis, Gorgonis quoque in scutis vibrati crines, ut ferocitatem ostendent capilli. Unde Claudianus de laudibus Stiliconis.

Illic ARMENIÆ vibratis crinibus alæ.

Idem. — *mixtus hic Colchus, Iberis,*
Hic mytra velatur Arabs, hic CRINE DECORO
ARMENIVS.

De Armeniorum vestibus sic Strabo lib. xi.

Armeniacam vestem Thessalicam esse aiunt, ut sunt DEMISSÆ
TUNICÆ, &c.

Certè in hac Gemma demissam tunicam gestat is qui scutum cum Medusa serpentibus carens, dextra tenet.